

Paur kute Ximoximã pi'ôk kumrêx no'ôk ne ja.

Paur ne krabê Ximoximã pi'ôk no'ôk ne. Mýjkôt ne o kra? Jejukôt. Kute kum arênh nhym kute tu amim markumrêxkôt ne o kra. Nhym kam arkum aben kïnhkumrêx ne.

Nhym kam Paur kumrêx ne krïraxbê Epexukam bôx ne kam ar memã Metïndjwýnh'ã ujarênh ba ne kam tẽ. Nhym kam Ximoxidjwý arým kam bôx. Kam tẽn bôx ne kam ar kam memã 'ã ujarênh ba, memã Jeju jarênh ba. Nhym me kwý arým prïne amikajmãtã Jeju ma. Nhym bep ar kwý ne ar arïk 'êx ne kute amijo Jeju mar. Ar kute mar kêtumrêx ne arïk 'êx ne memã mýjja jarẽ. Nãm we ar,

–Kwãrïk wãnh abenwýr mör kêt, ane. Ne,

–Mrywã kur kêt, ane. Nãm ar ã kupa'ã me akre ar o bao ane. Ar ja 'ã ne Paur Ximoximã kum,

–Dja ga akabêno ar ity gê ar anhikrê, ane. Ne kam ajte me kute amim Jeju mar'ã kum karõ ne kum,

–Ë, Jeju nhõ me jao ba djwýnhmẽ me atãri àpênhjamẽ gêdja ar katàt mrãn memã Metïndjwýnh'ã ajarẽ, ane. Ne kam Ximoximãdjwý kum,

–Ë, gadjwý, gadjwý dja ga katàt mrãn Metïndjwýnh kabênkôt prïne memã arẽ, ane.

Ne kam ajte me'ã kum karõ, me Metïndjwýnh kabênkôt katàt mrãnhmã, me mymẽ me niremẽ me ari memã àpênh kajgo ar bajamẽ me 'uwtïmẽ, me kunĩ. Me kunĩ ne me Metïndjwýnh kabênkôt

katàt mrãnhmã ajte Ximoximã me'ã karõ. Ne kam me'ã kum pi'òk no'òk ne kum ano. Tãm ne ja.

¹⁻² Akmere Ximoxi, ba ibê Paur ne ba amã pi'òk no'òk ne. Ximoxi, ikra djwýnh, amã ne ba pi'òk no'òk ne. Ije amã Jeju jarênh ga tu aje amim markumrêx kôt ne ba arým ajo ikrakumrêx ne. Ba ibê Paur, ne ba amã pi'òk no'òk ne. Djãm ba ne ba Jejumã idjãpênh? Kati, Metĩndjwýnhmê Kritu Jeju ar ta ne ar imã idjãpênh jarên ijano, ije memã 'ã idjujarênhmã ijano. Metĩndjwýnh, kute gu bapytâr djwýnhjamê Kritu Jeju gu baje amiwýr kam amakjamê, ar ta ne ar imã kabên jarê ba kam arkum idjãpênh iba.

Be, gê Metĩndjwýnh ajo djuw mex. Kritu Jeju gu banhõ Bẽnjadjwýrmê Bãmbê Metĩndjwýnh ar ukapríkôt ajo djuw mex ne ar ajo ba. Gê arkum akaprĩ ne amã umar mex jarê, ga kam adjumar mex ne ar aba.

Kute Metĩndjwýnh kabên jarênh djwýnh 'êxnhĩ bôxmã arênh.

Rô 16.17; Xim k 6.3; Xit 1.10

³ Ê, dja ga arek Epexukam djan nêje ar kukrà. Wãnh ne ar kwý arík kupa'ã ar memã arênho ba, Metĩndjwýnh kabên kupa'ã ar memã arênho ba. Dja ga nêje akabêno ar ity. Nã bãm itêm kutã, pykabê Matenimã itêm kutã amã ikabên jarên kam arým ajbir ajte ar'ã amã pi'òk no'òk ne ano.

⁴ Dja ga arkum,

—Kwãrĩk wãnh ar me tũmre'ã ujarênh kajgomê me akukãmãre nhidji me kute tũmràm abenmã arênhja kwãrĩk on wãnh nõ. Kôt ne me abenmã

kabên ar ban kam me kute amim Metîndjwÿnh mar ne 'ãno ãm kêt. Tãm dja on wãnh nõ, ane.

⁵ Akmere Ximoxi, mÿj kadjy ne ba amã ikabên ja jarê? Bir, me kum aben jabê kadjy. Godja me ôkre kadjwÿnhbê axwe 'õ nõr kêt ne kute amikam axwe 'õ mar kêt kam arÿm kôt kum aben jabê. Ne kam ajte me kute mrãmri amim Jeju markumrêx kôt ne me kum aben jabê. Kadjy ne ba amã ikabên ja jarê.

⁶ Bir be, me kwÿ arÿm kute ja mar prãm kêt kam arÿm kabên kajgoo kumex, ne abenkam kangao kumex. Jabit ne me kuma. ⁷ Djãm me ja kute mÿjja mar got. Kute Môj djê kukràdjà mar kêtjakam kukràdjà kupa'ã ar memã arênho ba. Ar ta ne ar amijo memã mÿjja'ã ujarênh djwÿnh ne. Ne kute memã,

—Mrãmri ne ba ije me amã arênhja. Kôt ne ba me amã arê, anhÿr ar o ba. Bep kati, ar kute ta amikabên mar kêt ne Môj djê kukràdjà mar kêt.

⁸ Be, Môj djê kukràdjàja ne mexkumrêx. Gu arÿm kuma. Ne ren ar kuman kôt ar amijo ba nhym arÿm rãn mexkumrêx. Nhym bep kati, ar ja kute mar kêt ne ar kupa'ã memã arênh ar o ba.

⁹ Be, nhÿnh me jamã ne Môj djê kukràdjàja? Djãm me kute katàt amijo bajamã? Kati, me kute axweo amiptàrjamê, me amakkre kêtjamê, me kute Metîndjwÿnh mar prãm kêtjamê, me axwejamê, me kute mÿjja punubit mar prãmjamê, me kute Metîndjwÿnh japrÿjamê, me kute nãmê bãm ar parjamê, me kute me parjamê ¹⁰ me prõ nàr mjên prãmjamê, me my ta kute aben nÿnho bajamê, me kute mekbê krao àkÿnhjamê, me 'êxnhÿjamê, me kute me kà mex jarênhjamê, nàr me kute

mÿjjao amiptâr, Metĩndjwÿnh kute katàt memã amikukràdjà jarēnh ne mekbê mÿjja pyma nhym me kute o amiptârjamē. Me ja kunĩ kadjy ne Mòjdjê kukràdjàja. Gu arÿm kuma.

¹¹ Nà, Metĩndjwÿnh amikabēn nykôt katàt memã amikukràdjà jarē. Djãm kabēn ny punu got. Axwe mextire. Metĩndjwÿnh ne mexo, umao me rer mex ne. Nhym kabēn nydjwÿ ã mexo, umao ane. Nhym kam ta, Metĩndjwÿnh kĩhtire ta ne imã amijã ujarēnh ny jarēn ijano ba kam ô'ã memã arēnho tē, memã 'ã idjujarēnh tē.

Kritu kum Paur kaprĩ ne kute àpēnh 'ã mēnh.

¹² Ë, akmere, mrãmri ne Kritu Jeju gu banhõ Bēnjadjwÿr amim idja. Kum idjàpēnhmã ne amim idja. Nãm amikajmã'ã ima, ije 'ã INGRÀ TÿX ne kanga kētmã kôt tu iman amim idjan imã idjàpēnh jarē.

—Dja ga imã apê, ane. Ne kam kadjy imã TÿX jadjà ba kam kum idjàpēnh mex ar iban kôt kum amikĩnh jarē. Mrãmri ne Kritu Jeju imã mexkumrêx ba kam kum amikĩnh jarē.

¹³ Amrêbê ne ba Jeju japyr ar o iban arĩk ùno iban Jeju nhõ me jao ibikēnho iba. Nã bãm te Jejukam ijaxwe nhym tu kum ikaprĩn kam amim idja. Nà, mrãmri ne tu kum ikaprĩ. Kraxje ije amikajmã'ã Jeju mar kētkam ije amimar kêt nhym bi kum ikaprĩ. ¹⁴ Nãm gu banhõ Bēnjadjwÿr tu ukaprĩkôt kum ikaprĩ raxkumrêx ne prĩne ijo djuw mex. Djãm ukaprĩ kêt got. Kum ikaprĩ rax ba arÿm jakam ije amikajmã'ã amim markumrêx. Ije amikajmã'ã Kritu Jeju markumrêx ne imã abê:kumrêx.

15 Ë, mrãmri ne me abenmã kum,
 –Kritu Jeju arÿm pykamã ruw, kute me axwe
 pytàrmã ne ruw, ane. Mrãmri ne me abenmã
 arê. Kabên ja dja me tu markumrêx ne amija-
 makkrekam kunhò. Be, kute me axwe pytàrmã ne
 pykamã ruw.

Ba ne ba ijaxweo me axwe kunĩ jakre. 16 Te
 ijaxwe rax nhym bi kum ikaprĩ rax ne. Jeju Kritu
 kute akrànmã meo tēm nhym me kute mar kadjy.
 Te ijaxwe raxo ije me kunĩ jakrenh nhym mã
 Jeju kute akrànmã prĩ'ã ijo tēmja pumũ. Mÿkam?
 Godja me'õ kute ijaxwe pyræk ne kute Jeju japyrÿ
 jabej dja ikôpdji'ã ã ikudjwa anen tu amim Jeju
 kamnhĩxkumrêx ne kam ikudjwa tyk nhijukri tĩn
 rã'ã rã'ã kadjy. Kadjy ne Jeju kum ikaprĩn
 akrànmã prĩ'ã ijo tē. Kam ne ba amã,

–Jeju kute me axwe pytàrmã ne pykamã ruw,
 ane.

17 Be, Metĩndjwÿnh djukaprĩja pumũ. Kumã dja
 me rax jarê. Djãm bēnjadjwÿr ngri got. Dja memã
 Bēnjadjwÿr rax rã'ã: rã'ã Bēnjadjwÿr rax. Dja tyk
 kêtikumrêx ne. Me kute noo omũnh kêtikumrêx
 ne. Kubê Metĩndjwÿnh pydji. Atemã 'õ kêtikumrêx.
 Kumã dja me rax jarēn kum uma jarēn mex jarē.
 Dja me kum arēnh rã'ã: rã'ã ne. Mrãmri. Tãm ne ja.

18 Ë, ikra Ximoxi, akmere, ba arÿm amã ik-
 abēn jarē. Gora ikabēn ja ma. Amrēbê ne me
 Metĩndjwÿnh kabēn jarēnh djwÿnh adjàpēnhmã ak-
 abin prĩne adjàpēnh'ã amã karõ. Kôt ne ba amã
 ikabēn ja jarē. Ë, dja ga ar ikabēn ja man kôt atÿx
 ne. Ë, ba me abenwÿr prõt'ã atÿx jakre. Ë, gora
 atÿx. Gora atÿx ne amã me uma kêt ne kàj bê
 memã Metĩndjwÿnh kabēn jarē gê me amikajmãtã

kuma. Kute me tỳx kum me uma kêt ne tu kute abenwỳr prôtja pyràk.

¹⁹ Nà, dja ga ã anen Jeju'ã angrà tỳx ne amim mỳjja mexbit man kôt amijo aban kam amikam ajaxwe 'õ mar kêt-kumrëx ne ar aba.

Nhym bep me kwỳ ne me arỳm Jeju'ã ngrà tỳx kêt ne kôt amijo ba kêt ne kam arỳm kangan amijo ajkê. ²⁰ Be, Imenemê Arexārimê ne ar arỳm Jeju kangan amijo ajkê. Arỳm ne ar amijo ajkê. Kam ne ba arỳm Xatanajmã ar kanga, ar kute Jeju japrỳ kêt kadjỳ ne ba arỳm kum ar kanga.

2

¹ Be, akmere, ba amã arê ga aman amũ idjô'ã memã arê. Dja me Metĩndjwỳnhmã mã kabên ne kum me kunĩ jarê. Mã ne mete Metĩndjwỳnhmã kabên kute? Dja me kum aben jarên kum abeno a'uw. Ne kam jãm meo akêx ne me jadjwỳ kum meo a'uw. Ne kôt kum òdjānh jarên kum amikĩnh jarê. ² Nà, dja gu me kum pykakam me bēnjadjwỳr rũnhjao a'uw ne kam ajte me bēnjadjwỳr kry kute meo ba jadjwỳo a'uw.

Mỳkam? Bir, me kute akrānmã me bajo ba gu me badjumar mex ne ar baba kadjỳ. Kam dja gu me Metĩndjwỳnh kabēnkôt ar baba ne kôt ar amijo baba katāt ne. ³ Be, me ã kute Metĩndjwỳnhmã kabēno anhỹrkam mexkumrëx. Kam dja Metĩndjwỳnh mekam kĩnhkumrëx. Metĩndjwỳnh kubê me bapytār djwỳnh dja mekam kĩnhkumrëx.

⁴ Nà, kute me kunĩ pytār prām-kumrëx. Nãm arỳm memã katāt kabên nhym me kute tu markumrëxmã. ⁵ Nà, Metĩndjwỳnh pydjii ne

kam ajte kute Bãm'ã me bamënh djwýnh pydjii, kubêngôkre,* kubê ne Kritu Jeju. Me bajaxwekam ne gu me Metïndjwýnh'ýr babôx kêt ne. Nhym kam kra ta amijo kubêngôkren me bawýr bôx ne kam Bãm'ýr me bajo bôx. Gu me kam arkôt baba. Kute Bãm'ýr me bajo bôx djwýnh pydjii. Atemã 'õ kêt, kubêngôkre, kubê ne Kritu Jeju.

⁶ Jeju ta, kute memã amikangan me kunĩ pãnh tyk, tãm ne amrëbê Metïndjwýnh 'ã akati jakre nhym arým 'ýr bôx nhym kam arým amijo aptàn memã amikangan me kunĩ pãnh ty, me kunĩ kute mar kadjy. Me kunĩ kute,

—Mrãmri Metïndjwýnh kum me bajabên kute me bapytãrmã, anhýr kadjy. Kadjy ne ty.

⁷ Kam ne Metïndjwýnh ijano ba tẽ. Ba ikumrëx itëm ne ije memã Metïndjwýnh kute me utàr jarënhmã. Jeju kute ijanorkôt ne ba me bajtemd-jwý'ýr tën bôx ne memã kàj bê Metïndjwýnh'ã ajarë. Nã bãm memã Metïndjwýnh kabën katåtja, 'êxnhĩ kêtja jarë nhym me amikajmã'ã kuma. Kadjy ne ijano ba tẽ. Mrãmri ne ikabënja. Ijêxnhĩ kêtikumrëx.

⁸ Ije, ije ar amã Metïndjwýnh jarënh gar aje kum akabënmã ba ate o akno. Ba akubyn ar amã arë gar ama.

Dja pyka kunĩkôt mete abeno bikprõnhkam me my Metïndjwýnhmã kabën. Dja me prïne Metïndjwýnhmã amijarë. Me mexo mexikumrëx,

* **2:5** Kritu ne amijo kubêngôkre kute mrãmri ne apýnh me õ pyka djari kunĩkôt me kunĩ: bêngôkreja pyræk. Kubê kà jakamë me kakrãtykmë me babêngôkremë ne me kunĩ: bêngôkre. Me kamrômë me kukràdjã kunĩ kubêngôkreo aben pyræk. Jakam dja ga Karõ 17.26 jarën ama.

me kute mÿjja punu 'õ mar prãm kêt, me ja dja me kum kabên. Nhy m bep me ngryknhĩ, me kute kabêno aben japanh, me tãm dja me kum kabên kêt ne.

Me nire kute akrànmã amijo bamã.

Kô k 14.34; Xit 2.3; Ped k 3.1

⁹⁻¹⁰ Nhy m me niredjwÿ. Dja me nire kute Jeju marja akrànmã amijo ba mexkumrêx, kwãrĩk wãnh amimex ne me my nokam mrãnh kêt. Dja ga me apijãm ne ar aba. Mÿkam dja ga me akrãkãbito mex? Nã gã m me amikakrwÿnhmẽ akunhêrmẽ angãmẽ kubêkã mexmẽ o amimex ne ar aba. Me akrãkãbit ne mex. Me my nomã amrãnh kadjybit aje amikrã ngrãnh, amikakrwÿnh, ne amimex, ja ne punu. Bep kati, me nire kute,

—Ba ije Jeju mar, anhÿrja dja apÿnh kabên mexo amiptãn o amimex.

¹¹ Me kute Metĩndjwÿnhkôt abeno bikprõnhkam dja me nire anhikrên nhÿn Metĩndjwÿnh kabên maro nhÿ. Akrànmã dja me Jeju nhõ me jao ba djwÿnh kabên maro nhÿn amijamakkrekam kunhõ. ¹² Kwãrĩk wãnh me nire dja me me my jakre kêt ne me mymã kabên jarênh kêt ne. Nhy m bep me my gêdja me me niremẽ me mymẽ me akre nhy m me nire anhikrên me kabên maro nhÿ.

¹³ Mÿkam? Bir, Metĩndjwÿnh ne mybê Adão kumrêx nhípêx ne kam atãri nibê Ewa nhípêx ne.

¹⁴ Be djãm Xatanaj ne Adão noo akno? Kati, nija ne noo akno. Nhy m kam nija arÿm Metĩndjwÿnhkam amikrã. Be, kam ne ba amã,

—Kwãrĩk wãnh me nire dja me me my jakre kêt, ane.

15 Nija ne te Metĩndjwỳnhkam amikrà nhym mã Metĩndjwỳnh kum me nire jabêkumrêx ne me kra bixadjwỳr kutã me utã. Me nire kute Jeju marja gêdja me Jeju 'ãno dja ne mã kum me abêkumrêx ne kute mỳjja punu 'õ mar prãm kêtkam gêdja mexo mexkumrêx ne mã me my nomã mrãnh kêt. Godja me ã kute anhỳr jabej nhym Metĩndjwỳnh me kra bixadjwỳr kutã me utã nhym me kra me bĩn kêt ne.

3

*Kute ar kute Jeju nhõ me jao ba djwỳnhmã 'ã karõ.
Xit 1.6*

¹ Be mrãmri ne me abenmã kum,
—Gêdja me'õ kute meo ba prãm jabej, kute Jeju nhõ me jao ba prãm jabej, mrãmri mexkumrêx. Nã, mrãmri mexkumrêx. Nã, kôt ne me kute arênhja.

² Be, mã gêdja Jeju nhõ me jao ba djwỳnh kute? Me axwe kêt ne kute amijo ba mextire nhym kam me me'ã kabên kêtja, me prõ pỳnh, me bixaêr punu kêt, me kute amipnênh ne ar ba, me kabôt kati, me kute meo djuw mex prãm, me kute memã Metĩndjwỳnh'ã ujarênh prãm, me ja gêdja me Jeju nhõ me jao ba.

³ Kwãrĩk wãnh me kum kadjwati kangô* djãnh, me àkrê, me kute kabêno me apanh prãmja, me kute pi'ók kaprĩbit mar ne kute amim o àptàrja, kwãrĩk wãnh me ja gêdja me meo ba kêt ne. Bep kati, me ukaprĩmê, me kute umar mex marja dja me Jeju nhõ me jao ba.

* **3:3** Mỳjja me kute o kôm ne kôt bibãnh kunĩja, kadjwati kangômê uba kangômê, mỳjja kangô kunĩ ne me kum kadjwati kangô jarê.

⁴ Dja me'õ meo ba prãm jabej dja kumrëx amim prõmë kra jakre, ne arkum mrãnh mextire gê ar omün kam adjwýnhdjwý kôt mrãnh mexkumrëx. Dja amim ar jao ba mex nhym kra amakkre mex ne kabënkôt ar amijo ba nhym kam arým kôt Jeju nhõ me jao ba. ⁵ Nok ren me'õja ar meo ban kam prõmë kra jakre kêt kumrëx ne kam Metĩndjwýnh nhõ me jabit me akre, mã gédja on? Mã gédja kam nê? Ije, mýkam ne prõmë kraja ar o ba mex kêt nhym kra jaxwe rá'ã? Ije kum bep nãm ren amim prõmë krawã kumrëx jakren kam ren kôt Metĩndjwýnh nhõ me ja jakre. Mýkam ne prõmë krawã ar o ba kêt ne kam Metĩndjwýnh nhõ me jabit ar o ba?

⁶ Kwãrĩk wãnh me'õ ajbir kute Jejuo aminhõ ny'õ'ã Jeju nhõ me jao ba djwýnh mën timer. Mýkam? Bir, kute amiraxo àmra nhym kam ren Metĩndjwýnh kute o bikënh karõ dja me kute Jejuo aminhõ ny'õ'ã meo ba djwýnh mën timer. Ne ren amiraxo amra nhym ren Metĩndjwýnh o ajkë. Mrãmri kute Xatanajo bikënhja pyræk. Xatanaj kute amiraxo àmra nhym kam Metĩndjwýnh kute prĩne o bikënhja pyræk. Ne ren me'õ ajbir kute Jejuo aminhõ ne ren meo ban ren amijo amra, Xatanajkôt amijo amra nhym ren Metĩndjwýnh adjwýnhdjwý o ajkë.

⁷ Nhym bep kati, Jeju nhõ me jao ba djwýnh dja amijo ba mextire nhym kam me kätãmdjwý kum kĩnh ne kum mex jarë. Nãm ren arĩk ar ba nhym kam me kätãm rãn 'ã kabën ne. 'Ã kabën nhym kam rãn Xatanaj ikõta, Xatanaj meo ba djwýnhja nhikõta.

⁸ Nhyim Jeju nhõ me jao ba djwýnh jatãri me àpênhdjwý dja me katàt mrã gê me me'ã kabên kêt. Dja me kabên mexmẽ me kabên punuo aben nhikjê kêt. Dja me kum kadjwati kangô† djãnh kêt. Kwãrĩk wãnh gê me pi'ok kaprĩ prãmebit me noo biknor prãm kêt. ⁹ Dja me amim Metĩndjwýnh kukràdjà markumrêx ne 'ã ngrà tỳx ne. Metĩndjwýnh kute me bamãbit amikukràdjào amirĩtja, kukràdjà tãmbit dja me 'ã ngrà tỳx ne maro ba ne mỳjja mexbit mar ar o ba. Mỳjja mexbit mar ar o ban kam amikam axwe 'õ mar kêt. Kadjy dja me Metĩndjwýnh kukràdjà'ã ngrà tỳx ne ar o ba. ¹⁰ Dja me Jeju nhõ me jao ba djwýnh jatãri me àpênhja kumrêx kabi nhyim me kabên mex ne kam ar kôt àpênh ba. Godja me mrãmri mexkumrêx jabej ne kam arým àpênh ar ba.

¹¹ Nhyim Jeju nhõ me jao ba djwýnh jatãri me àpênh prõjadjwý. Me adjwýnhdjwý dja me katàt mrã gê me me'ã kabên kêt. Dja me me kà mex jarênh prãm kêt. Dja me bixaêr punu kêt ne ar ba. Dja me prĩne mrãnh mextiren kabên pýnh ne arẽ. Dja ã Jeju nhõ me jao ba djwýnh jatãri me àpênh prõja ã ane.

¹² Be, Jeju nhõ me jao ba djwýnh jatãri me àpênh gêdja me prõ pýnh ne. Dja me õ kikre kumrêxkam amim ar ja jakren arkum mrãnh mexkumrêx gê ar omũn kam adjwýnhdjwý kôt mrãnh mexkumrêx. Dja me amim krao ba mexkumrêx gê ar kabên mexkumrêx ne ar ba. ¹³ Godja me atãri me àpênhja mrãmri àpênh mex ne kam arým memã amimexo

† **3:8** Mỳjja me kute o kôm ne kôt bibãnh kunĩja, kadjwati kangômẽ uba kangômẽ, mỳjja kangô kunĩ ne me kum kadjwati kangô jarẽ.

amirîť nhym me kâtàmja arým me mex pumũn kam kum me kĩnh. Gêdja mekam amikam pijàm kêt ne kàjmã djan tu memã Jeju'ã ajarê. Me kute amim Kritu Jeju mar tũmkam tu memã 'ã ajarê. Bir be, dja ã Jeju nhõ me jao ba djwýnhmẽ atãri me àpênhmẽ ã ane.

¹⁴ Be, nã bãm amã ikabẽn'ã pi'òk no'òk ne amikukãm ano. Dja ba ĩ wãm kôt tẽ. Nã bãm amim itẽm djà ma. ¹⁵ Nàr kon birãm dja ba amikrà ga prĩne omũn kam kôt memã arẽ, me kute mar kadjy. Metĩndjwýnh kra kunĩ kute kôt ar amijo ba mar kadjy. Kadjy ne ba amã pi'òk no'òk jano. Apýnh pyka kunĩkôt ne me bakwý arým amijo Jeju pytã nhym Metĩndjwýnh arým kôt me bajo kra. Gu me kôt arým apýnh banhõ pyka djãri kam aprakamã kôt aben pydji, Metĩndjwýnh tĩnjakôt mã pyka kunĩkôt aben pydji. Ne me kâtammã Metĩndjwýnh kabẽn jarẽnh ar o baba, Metĩndjwýnh 'êxnhĩ kêt ne kute katat kabẽn jarẽnhja memã arẽnh ar o baba.

¹⁶ Bir be, djãm mýjja kakrit, djãm mýjja prĩre, djãm mýjjao bikẽnh ne gu me arým amim kuman kam amim kamnhĩxbê ar baba? Djãm mýjja ngri: got me tebê kute mar ne ate krãmã? Mrãmri ne Jeju ra:xi.

Nãm amijo kubêngòkren‡ kato.

Nhym Metĩndjwýnh Karõ kabin axwe kêt mã katon kôt memã arẽ.

‡ **3:16** Kritu ne amijo kubêngòkre kute mrãmri ne apýnh me õ pyka djãri kunĩkôt me kunĩ: bêngòkreja pyrãk. Kubẽ kà jakamẽ me kakràtykmẽ me babêngòkremẽ ne me kunĩ: bêngòkre. Me kamrômẽ me kukràdjã kunĩ kubêngòkreo aben pyrãk. Jakam dja ga Karõ 17.26 jarẽn ama.

Nhym kadjy mrãnh djwýnhdjwý arek omũnh ar o ba.

Nhym me apýnh me õ pyka djàri kàj bê memã 'ã ujarêhho ajmã.

Nhym me kam pyka kunĩkõt tu amim markumrêx ne.

Nhym kam Metĩndjwýnh kàjkwamã o wabi, õ kàjkwa mextiremã o wabi. Õ kàjkwa mexo kute pykabê mýjja kunĩ jakrenhjamã o wabi.

Nãm ã Jeju raxo ane.

4

Kubê me kabên 'êxnhĩ pyma.

¹ Be, akmere. Anhýr djwýnhràam ne Metĩndjwýnh Karõ arým prĩne me bamã arẽ, ne,

—Pyka kute o ino rer 'ýrkam dja me kwý amibê Jeju kangan ate amijo ba. Arým kum kĩnh kêt ne kam ate me karõ 'êxnhĩja kabên ma, me karõ djujarêh punubit man kõt amijo ba, ane.

² Nã, mrãmri me kwý dja me me karõ djô'ã me akre. Me ajkwao bit kute Jeju mar ne 'êxja, me tãm ne me õkre kadjwýnhbê kute mýjja punubit markam pijàm kêt mex ne arĩk 'êx ba ne me karõ 'êxnhĩ djô'ã me akre ne memã kum,

³ —Kwãrĩk wãnh abenwýr mör kêt. Dja ga me tu akuprýkumrêx ne ar aba, ane. Ne ajte mry'õ nãr me àkur djã'õ mekbê uman memã,

—Kwãrĩk wãnh krên kêt, ãm omũ, ane. Nhym bep kati, Metĩndjwýnh ta ne me bamã mry, me badjàkur djã nhipêx, me baje 'ã kum amikĩnh jarêh ne krên kadjy ne me bamã ipêx. Me baje amim Jeju markumrêx ne kam kõt baje mýjja marja, me

bamã ne Metĩndjwýnh me banhõ kwý krën djã'ã apýnh mýjja nhípêx.

⁴ Be, mýjja kunĩ Metĩndjwýnh kute ipêxja ne mexkumrêx. Djãm mete mry nãr djwý'õ kanga kadjy ne Metĩndjwýnh ipêx? Arkati, me kute Metĩndjwýnhmã 'ã amikĩnh jarënh ne tu kute amim byr ne krënmã ne ipêx. ⁵ Metĩndjwýnh kabënkôt arým mrymë apýnh me badjàkur djã mexkumrêx. Mýjja kunĩ ne arým mexkumrêx. Gu me arým 'ã kum amikĩnh jarë nhym arým mexkumrêx.

⁶ Akmere, dja ga memã arë, me kute Jejukôt abeno kamymã ikabën ja jarë. Godja ga memã ikabën ja jarën arým mrãmri abë Kritu Jeju nhõ àpênhkumrêx. Nã, Metĩndjwýnh kabën ne gu baje tu amim markumrêxja, kôt dja ga arek amijo tën amijo tën kam atýxkumrêx. Jeju kukràdjã mexkumrêx, tãm ne ga arým kôt amijo tẽ. Dja ga arek kôt amijo tën amijo tën arým atýxkumrêx. Atýx ne arým Kritu Jejumã adjàpênh mex ne.

⁷ Nhym bep me tũmre'ã ujarënh kajgoja dja wãnh nõ. Tãm ne punu. Kati, dja ga prĩne Metĩndjwýnh kukràdjãkôt amijo tẽ. Katãt amrãnh kadjy dja ga arek amijo tën arek amijo tën kam amitýxmã amijakre. Djãm akrãkã'ã ne ba amã ane? Kati, akadjwýnhbë atýx'ã ne ba amã ane.

⁸ Mrãmri ne me ĩ krãkã týx kadjybit amijo djuw mex. Ja ne kãjbë mex. Nhym bep me kadjwýnhbë me týxja mete Metĩndjwýnh kukràdjãkôt amijo tẽmkam týx, ja ne mrãmri mexkumrêx, tũmrãm mexkumrêx. Pyka jakam gu badjumar mex ne ar baba kadjy mex. Ne kam ajte batyk nhijukri

akubyn batĩnkam kadjy mexkumrëx. Kadjy ne ba amã,

—Metĩndjwỳnh kukràdjàkôt amijo tẽn kam kôt atỳx, kôt amex, ane.

⁹ Mrãmri ne kabẽnja nhym me abenmã arẽ. Kabẽn ja dja me tu markumrëx ne amijamakkrekam nhòrkumrëx. ¹⁰ Metĩndjwỳnh kute me kunĩ pytâr djwỳnh, bep me baje amikajmãtã marja ne mrãmri kubê me bapytâr djwỳ:nhkumrëx. Mrãmri ne gu me amim Metĩndjwỳnh kamnhĩxbê ar baba, Metĩndjwỳnh tĩnja kamnhĩxbê ar baba. Kam ne gu amikukãm kuman kam badjapênh rax ne memã arẽnho tẽn, batyk djã kêt ne memã arẽnho tẽn.

Metĩndjwỳnhmã àpênhkumrëxmã kum 'ã karõ.

¹¹ Be, akmere, dja ga apijãm kêt ne tu memã ikabẽn ja jarẽn memã Metĩndjwỳnh kukràdjã jarẽn.

¹² Kwãrĩk wãnh gẽ me amã,

—Ygê, e kum djãm ajabatànħ ne ga ar me akreo aba, anhỳr kêt. Bep kati, dja ga te ajbir ajabatànħ ne mã katat mrã gẽ me ajã amijakre, me kute amim Jeju marja ajã amijakre. Kadjy dja ga akabẽn mexbit jarẽnħ ar o aban amrãnh mex ne amã me abên amim Jeju markumrëx ne 'ã angrà tỳx ne aprõ prãm kêt ne ar aba. Dja ga ã ane nhym me ajã amijakren ã akudjwa amijo anhỳro bao ane.

¹³ Dja ga kàj bê memã Metĩndjwỳnh kabẽn jarẽn memã Metĩndjwỳnh kabẽno amirĩt ne memã kukràdjã jarẽn. Ja dja ga 'ãno adjãm rã'ã ba awỳr bôx. Ba ibê Paur dja ba awỳr bôx.

¹⁴ Amrêbê ne me kute Metĩndjwỳnh kabẽn jarẽnħ djwỳnh arỳm Metĩndjwỳnhmã adjan amã,

—Ë, Metĩndjwỳnh ne arỳm amijo apytà ga kum adjàpênhmã. Ta dja amã tỳx jadjà ga kam atỳx ne ar kum adjàpênh aba, ane. Nhyr kutã Jeju nhõ me jao ba djwỳnh akrã'ã ikra jadjuw, ga kam Metĩndjwỳnhmã adjàpênh ar aba. Kwãrĩk wãnh Metĩndjwỳnh kute amim adjarwão abiknor kêt. Memã Metĩndjwỳnh kukràdjà jarênh 'ãno dja ne mã memã 'ã adjujarênh aba.

¹⁵ Be, dja ga ikabênja tu markumrêx ne amijamakkrekam anhôn kôt amijo mõ. Dja ga ã amijo atêmo anen arỳm amrãnh mexkumrêxo tẽn o tẽn nhyr me kunĩ arỳm amrãnh mexkôt apumũn kôt amã kato. ¹⁶ Ë, ajaxwebê amipnên amrãnh katát kadjybit amima. Gora memã Metĩndjwỳnh kabên jarê. Gora memã arênh 'ãno dja. Godja ga anen arỳm amiptàn kam o me jadjwỳ pytà, me kute akabên maro ỳrjadjwỳ pytà. Tãm ne ja.

5

Mebêngêtemê me 'uwtĩ'ã kum karõ.

A Xim 2.24

¹ Ë, godja me kute amim Jeju marwã 'õ, mebêngêtte 'õ, me'õkam amikrà, kwãrĩk wãnh ga kum abên tỳx kêt ne akrãnmã kum akabên ne kum,

—Kwãrĩk wãnh ga ã anhỹr kêt, ane. Mrãmri ne me kra djwỳnh kute bãmmã kabênja pyrãk, akrãnmã kum akabên. Dja ga me kraremê me nõi nyreo akamyn me adjwỳnhdjwỳmã akabên mex jarê. ² Dja ga mebêngêxteo anãn me adjwỳnhdjwỳmã akrãnmã akabên. Dja ga me kra pỳnhmê me kurerero akanikwỳnhkumrêx ne

memãdjwý katàt akabën jarën mekam apijàm ne meo akanikwýnhkumrëx. Dja ga ã me kute amim Jeju mar kunĩmã akabën jarënho ane.

³ È, akmere, ba amã me 'uwtĩ'ã karõ, ga amũ idjõ'ã memã arẽ. Me kute amim Jeju marwã kute akrànãmã mebê mjên tykjao djuw mexmã. Me kute amim Jeju marwã dja me me 'uwtĩbito djuw mex.

⁴ Nhy m bep djãm me'õbê mjên ty nhy m arým kra nàr kon tàmdjwý 'õ arým ta amim o djuw mex ne. Me'õ kra 'õ nã kute amim o djuw mex nhy m abatàn h ne arým amipãnh amim não djuw mex ne. Ne me'õ tàmdjwý 'õ kwatyn h 'õ amim tàmdjwýo djuw mex ne. O djuw mex nhy m abatàn h ne kam amipãnh kwatyn ho djuw mex ne. Me kute mrãmri Metĩndjwýnh mar jabej dja ã õ kikre kumrëxkam amim me 'uwtĩo djuw mexo anen kam atãri amũ me jadjwý o djuw mex ne. Kam ne Metĩndjwýnh arým mekam kĩnhkumrëx ne.

⁵⁻⁶ Ate gêdja me'õbê mjên ty nhy m arĩk ar ba. Nãm amidjwýnhbit amiman ar amijo ba. Ne kam kute me'õ tyk pyræk. Tĩnri kute me'õ tyk pyræk, kute Metĩndjwýnh mar kêt kam, arĩk ar bakam. 'Uwtĩ kajgo ne wã. Kwãrĩk wãnh me wã. Me tãm dja gar aje Jeju marwã o djuw mex kêt. Nhy m bep atemã me'õ mjên kubê tyk nhy m kam ate: ar ba ne kam amijã Metĩndjwýnh kamnhĩxkumrëx ne kam kum kabën ne kum amijo a'uwn kam ajte jãm me jao akëx ne ajte kum meo a'uw. Akamãtkammẽ a'urimẽ kum kabën 'ãno dja. Me'õ tãm ne mrãmri 'uwtĩkumrëx. Tãmbit dja gar aje Jeju marwã o djuw mex ne.

⁷ Dja ga memã ikabën ja jarë gê me'õ kra nàr kon me'õ tàmdjwý õbikwa 'uwtĩo djuw mex. Dja o djuw

mex gê me 'ã kabên kêt. ⁸ Godja me kute amim Jeju mar 'õ ta ùrkwã djwýnhkam amim me jao djuw mex kêt ne kam arým mrãmri axwen arým Jeju kabên kanga, ne kute axweo me kâtãmja, me kute Jeju mar kêtja jakrenh mex ne.

⁹ Ë, ba amã me 'uwtĩ nhõ pi'òk'ã karõ. Dja ga me 'uwtĩ nhidji pi'òk no'òkkam anhõ, me kute amim Jeju marwã kute kôt meo djuw mex kadjy. Ë, kwãrĩk wãnh me abatãnh nybê mjên tykwã kwãrĩk wãnh me 'uwtĩkôt pi'òk no'òkkam idji nhôr kêt. Kubê mjên tyk bêngêxtebit dja ga idji nhõ gê me kute amim Jeju mar meo djuw mex.

Djãm ori arým 'ã amex 60 apêx jabej? Djãm ori mjên tĩnri krõ'ã mjên kêt nhym kam kubê mjên tyk nhjukri me kute krõ'ã o prõ kêt jabej? ¹⁰ Djori kum mýjja mexbit kĩnh ne ar o ba nhym me kunĩ arým kôt omũn abenmã arênh jabej? Djori amikõpdji'ã kra jakreo tẽ nhym kudjwa mexkumrêx jabej? Djori õbikwa kêtka meo djuw mex jabej? Djori prĩne Metĩndjwýnh nhõ me wão djuw mex ne memã õdjãnh jabej? Djori kum me umar punu kaprĩ jabej? Djori kute mýjja mexo amiptãrkôt kute mýjja mexbit mar jabej? Djãm ori ã kute anhýr jabej mrãmri mexkumrêx, me 'uwtĩkôt pi'òk no'òkkam idji nhõ, me kute amim Jeju marja kunĩ kute me 'uwtĩ jao djuw mex kadjy.

¹¹⁻¹² Nhym bep kwãrĩk wãnh ar abatãnh nybê mjên tykja kwãrĩk wãnh pi'òk no'òkkam me 'uwtĩ ro'ã idji nhôr kêt. Mýkam? Bir, ar 'uwtĩja kute õbê,

—Ba ikuprý gê me'õ iwýr mõr kêtka meo. Ba tu Kritumã idjãpênhbit, anhýrja tu o aknon ajte kum me my kĩnh nhym me'õ 'ýr mõr prãme kum Kritu

kĩnh kêt ne kubê amijo akêx nhym me arým 'ã kabên ne.

¹³ Nhym ar kam kum ukangabit ma ne kam kikremã ipôko tẽ. Djãm arkum ukangabit? Kati, nãm ar kabên prãmdjwý, ne me'ã kabên tẽ, me pijàm djàbit, mýjja punubit jarênho tẽ.

¹⁴ Kam ne ba memã kum,

—Dja ar abatành nybê mjên tyk ajte mjên ne kam amim kra mý ne kramê mjéno djuw mex ne akrànMã àpênh ar ba. Be, nã bãm ã ar abatành nybê mjên tykjamã ane. Mýkam? Bir, me bakurê djwýnh kute me bajã kabên kêt kadjy. ¹⁵ Bir be, Ar kubê mjên tyk kwý arým Jeju kangan Xatanajkôt amijo ba. Kam ne ba amã arê.

¹⁶ Nhym bep me kute amim Jeju mar ni 'õ nàr my 'õ òbikwabê mjên tyk jabej ta dja amim òbikwa 'uwtĩo djuw mex. Nhym ate me kute Jejukôt aben pydjija gêdja me'õ 'uwtĩkumrêx ne ate: ar bajao djuw mex ne.

Me kute kàjmã meo ba djwýnh kamênhmã.

¹⁷ Ë, me jadjwý. Jeju nhõ me jao ba djwýnh kute prĩne meo baja, ar tãm dja me kàjmã me kamê. Jeju nhõ me jao ba djwýnh kute memã Metĩndjwýnh kabên jarênh ne kute memã o amirĩtkam àpênh rax. Me tãm dja me mrãmri kàjmã me kamên memã o pãnh mex ne. Ar kute memã Metĩndjwýnh kabên jarênh pãnh.

¹⁸ Kam ne Metĩndjwýnh kabên'ã pi'òk no'òkkam memã,

—Mryti kute amã àpênh ar ba ne kute amã bàygogo 'ykà ka'uko ipôko ãmja kwãrĩk wãnh inhu djuwpre kêt gê ta àpênh pãnh àkur tẽ. Nãm mryti'ã

Metĩndjwỳnh nhõ me jao ba djwỳnh jakren àkur'ã kum pãnh jakre. Jeju nhõ me jao ba djwỳnhmã me kute o pãnhmã. Ne ajte Metĩndjwỳnh kabẽnkam ne,

—Me àpênh ne pãnh, ane. Me àpênh me mãnhkutã tãm gêdja memã o pãnh, ane. Kam ne ba amã,

—Dja me Jeju nhõ me jao ba djwỳnhmã o pãnh mex, ane.

¹⁹ Ë, mỳjja 'õdjwỳ dja ba amã arẽ. Gêdja me Jeju nhõ me jao ba djwỳnh'ã kabẽn ne arĩk me kãtãm jarẽ ga tu ate akrã. Djãm me 'êxnhĩ kêt got. Nhym bep me'õ ar amãnhkrut nàr kon amãnhkrut ne ikjê kêt ne mrãmri kute noo axwekôt omũnh ne axikôt arênh ga kam arỳm tu 'ỳr tẽn kum akabẽn jarẽ gê amim kato. ²⁰ Godja mrãmri Jeju nhõ me jao ba djwỳnh kute mekam axwe jabej dja ga tu me kute amim Jeju mar nhipôkri kum abẽn tỳx, me kute maro ỳrja tĩn prãm ne axwe kêt kadjy.

²¹ Ë, ba amã mỳjja 'õdjwỳ jarẽ. Dja ga tu memã akabẽno aben pyrãk. Dja ga tu me kunĩmã axikôt akabẽn.

Ë, Metĩndjwỳnhmẽ Kritu Jejumẽ Metĩndjwỳnh kute amijo kadjy mrãnh djwỳnh pytãr ja, ar kute ikabẽn mar ne ikôt kabẽnkam ne ba mrãmri tu amã ikabẽn jarẽ.

Ë, gora ikabẽn ja ma. Ikabẽn kunĩ ma, prĩne ikabẽn ja ma. Ë, dja ga me kunĩmã akabẽno aben pyrãk. Kwãrĩk wãnh me umaje anhõkre kadjwỳnhbê amim,

—Be, inhõbikwa ne ja. Ba kum ikabẽn kêt, anhỳr kêt. Dja te anhõbikwa, ga tu kum akabẽn jarẽ, apijãm kêt ne tu kum akabẽn jarẽ.

Nàr kon, kwãrĩk wãnh anhõkre kadjwỳnhbê amim,

—Be, tâwã ne òbikwa krãptĩ. Ba kum ikabên kêt, anhÿr kêt. Dja te òbikwa krãptĩ ga tu kum akabên jarê, amã me uma kêt ne tu kum akabên jarê. Dja ga tu me kunĩmã akabêno aben pyrãk.

²² Ê, kwãrĩk wãnh ga arĩk aje me kabi kêt kam Metĩndjwÿnhmã me umjÿr kêt, kum àpênh kadjy kum me umjÿr ne 'ã anhikra jadjwÿr kêt. Dja ga anen ano katon tu mar kêt ne Metĩndjwÿnhmã me'õ dja nhym arÿm mekam amikràò ba jabej ga kam ga mãn kute ajaxwe pyrãk. Kwãrĩk wãnh ã anhÿr kêt ne mekòt ajaxwe kêt. Ga dja ga tu katàt mrã.

²³ Ê, atikkrekam akanê prãm kam ne ga akanê prãm ne. Kadjy dja ga uba kangò kwÿ ikõ. Uba kangòmẽ ngòmẽ apÿnh dja ga o akõmo tẽ.

²⁴ Ê, me kwÿ ne me axwekam amirĩtkumrêx. Nhym me kunĩ kòt omũn arênhò kumex. Nhym kam me memã axwe pãnh jarê. Nhym bep me kwÿ ne me axwekam amirĩt kêt ne. Metĩndjwÿnh gêdja tũmrãm memã o amirĩt ne memã kum katon memã pãnh jarê nhym me kam kòt omũ. ²⁵ Nhym me mexdjwÿ ne me amirĩt ne. Nhym me abenmã me arê. Nhym me kwÿ apdju ne. Djãm mrãmri tu bipdjurkumrêx? Kati, Metĩndjwÿnh gêdja tũmrãm memã me mexo amirĩt ne, nhym me arÿm kòt omũ.

6

Me ò àpênh kajgoja'ã kum karõ.

Ep 6.5; Kor 3.22; Xit 2.9; Ped k 2.18

¹ Ê, akmere, dja ga me memã àpênh kajgo ar bawã, me kute meo pãnh ne amim me pa 'amÿnh nhym me memã àpênh kajgo ar ba ne kute amim

Jeju mar wãdjwýmã arê gê me õ bēnjadjwýr kabēn kôt amijo ban prīne kabēn ma. Mýkam? Bir, me kàtàm kute Metīndjwýnh japrý kêt kadjy, ne kute Metīndjwýnh kukràdjàdjwý japrý kêt kadjy. ² Dja ga ajte me memã àpēnh kajgo ar bawãmã kum,

—Ë, djori ar anhõ bēnjadjwýrwã ar akudjwa kute Jeju mar jabej kwārīk wãnh gar amã kurê kêt. Djãm ar aje Jejukôt abeno akamykam amã kurēmã got. Arkati. Dja gar tu kum adjàpēnh mextire ne ar aba. Mýkam? Bir, ar akamymã ne gar apê. Kute Jeju mar 'õ, Metīndjwýnh kum abê 'õ, kumã ne gar apê. Kam dja gar kum adjàpēnh mextire ne ar aba, ane. ã me pardjamã ane.

Ë, gora prīne memã ikabēn ja jarēn ikabēn jao amirīto aba.

Nêkrêxkôtbít me umarja ne me umar mex kêt kumrêx.

³⁻⁴ Godja me'õ atemã kabēn 'õ jarēnho ku'ê prãm jabej arým amijo ajkēn kam Bēnjadjwýr Jeju Kritu kabēn mexja kubê kính no kati ne kam kôt kabēn kêt ne. Ne ajte Metīndjwýnh kute katàt gu bakrã pymjýr'ã ujarēnhja kubê kính no kati ne kam kôt kabēn kêt ne. Mrãmri ne 'êx ne amiraxbito amran kam kute mýjja mar kêt mexi. Nãm ajbãn ajmãn me kukràdjà kajgo mex mýr jabej memã akij. Ne kam kabēno me apanhbit mar prãm. ã me kute anhýr ne punu. Nãm me ã anhýr ban kam mýjja kukràdjà'ã ngryk ne abenbê meo bikjêro ban aben japrý ne aben kamnhīx ar o ban ⁵ mã kabēno aben japanh ar o ba. Mýjwã ne arým me ja djumar djà ajmã o nhym me arým katàt kabēnkumrêxja mar kêt. Nãm me nêkrêx prãme 'êx ne we,

—Be, ba amijo Jeju mar gê inhõ nêkrêx kumex ba kam amimexkumrêx ne, ane. Nãm me ã nêkrêx prãme amim 'ã karõo ane. Kam ne me abenkam axwe ar baja.

⁶ Mÿjkôt ne me umar mex ne amimex ar o ba? Bir, me kute Metĩndjwÿnh kukràdjãkôt amijo ba ne nêkrêx jabej umar kêt kam ne me umar mex ne ba. Ne amidjumar mexwão amimex ar o ba. ⁷ Mÿj ne gu me banã tikkre kurũm amÿn o axidjuw? Kati, nã gu me banhÿkam axidjuw. Me batykkamdjwÿ, mÿj ne gu me amÿn o banhikwãn ty? Kati, nãm gu me banhÿkam banhikwãn ty.

⁸ Bir be, dja me banhõ kwÿ krên djãmẽ me banhõ kubêkã jabej, mrãmri, me bamãnhkutã. Kam dja gu me badjumar mex ne atemã mÿjja 'õ jabej kêt. Metĩndjwÿnh dja me bajo djuw mex ne. ⁹ Nhym bep me kute amim nêkrêx nãr pi'ók kaprĩo àptàr ne kute o amimexja dja me amijo ajkẽ. Nãm me nêkrêx prãme ar axwe ba ne kam te kum nêkrêx prãm kêt mã ne mã nêkrêxbit ma. Ne kum mÿjja kakritmẽ mÿjja punubit kĩnh ne kôt arÿm amijo ajkẽ ne kam arÿm tu biknorkumrêx ne.

¹⁰ Bir be, nãm me ã kum nêkrêx nãr pi'ók kaprĩbit kĩnh ne ã amijo ane. Ne arÿm amijo bikênh mex ne. Mÿkam? Bir, nãm me kum nêkrêxbit kĩnh ne kam ajbit man kam kôt apÿnh axwe djãri kunĩkôt amijo ba. Memã nêkrêx prãm kwÿ ne me arÿm Jeju mar kangan kam arÿm amijo ajkẽ, kaprĩo prĩne amijo ajkẽ.

Akubyn Ximoximã kute katàt amijo bamã 'ã karõ.

11 Nhym bep ga, akmere, ga abê Metĩndjwýnh nhõ àpênhkam dja ga mýjja ja kunĩmã akre rax ne. Katàt amrãnh kadjy mýjja jamã akre rax. Katàt amrãnh ne aje Metĩndjwýnh kukràdjãkõt amijo aban aje amim Jeju kamnhĩxbê ar aban amã me abên aje akrãnmã amijo atêm, kam dja me ajo ajkê ga mã aje akrãnmã amijo atêm ne anhĩ djuwbôn ar abamã, tãm dja ga ama.

12 Me kute amim Jeju mar ne kõt amijo tēm ne kute me kute aben rer pyrãk. Me kute aben rerkam ne me tỳx ne prõtobit prõt ne mebê apõx. Kam dja ga 'ã amijakren ã atỳxo anen mã Jekukõt amijo tē, kute me prõtja pyrãk. Gora ga ã anen kam atyk nhijukri atĩn rã'ã rã'ã rã'ã 'ỳr tu abõxkumrẽxmã. Kadjy ne Metĩndjwýnh amiwỳr ajuw. Kadjy ne ga me ipõkri memã katàt amijarēnh mex ne. Nã gãm memã kum,

—Be, arỳm ne ba tu amikajmã'ã Jeju markumrẽx, ane. Nã gãm ane, nhym me apumũ. Kam ne ba amã,

—Arek amijo tēn kam atyk nhijukri atĩn rã'ã rã'ã rã'ã 'ỳr tu abõxkumrẽx, ane.

13 Ë, Metĩndjwýnhmẽ Jeju Kritu ar kute ikabēn mar ne ikõt kabēnkam ne ba amã ikabēn jarē. Metĩndjwýnh ne mýjja kunĩo tĩn djwýnh. Ta ne kute ikabēn mar ne ikõt kabēn. Kam ne ba amã ikabēn jarē. Nhym Kritu Jejudjwý kute katàt amijarēnh mexja, kute bēnjadjwýrbê Põxu Piratu kabem katàt amijarēnh mexja. Ar kute ikabēn mar ne ikõt kabēnkam ne ba amã ikabēn jarē ne amã,

14 —Ë, gora prĩne ikabēn man kõt amijo aban kudjar kêt ne amrãnh mextire gê me ajã kabēn kêt. Dja ga mã ã anhỹro aba rã'ã nhym arỳm

Jeju Kritu gu banhõ Bēnjadjwỳr kato. ¹⁵ Dja ò akati arỳm 'ỳr bôx nhym Metĩndjwỳnh dja kum arē nhym arỳm bôx. Nà, Metĩndjwỳnh ta pydji ne memã Bēnjadjwỳr rax ne meo ba. Atemã 'õ kêt. Metĩndjwỳnh umar mex ne kĩnhkumrêx tãm ne Bēnjadjwỳr raxbê kumkatiti:. Kute bēnjadjwỳr raxo pykabê me bēnjadjwỳrja kunĩ jakrenh mexi. Kam ne kubê Bēnjadjwỳr raxbê kumkatiti: ne meo ba. ¹⁶ Ajbit pydji ne tyk prãm kêtikumrêx, tĩn rã'ã: tĩn djwỳnh. Ne irākam ar ba, arngrokam ar ba. Nãm kam axwe 'õ kêt. Kam gêdja me têp kêtikumrêx. Nhỹnh got me'õ arỳm noo omũ? Arkati. Me'õ kute noo omũnh kêtikumrêx. Dja tũmrãm omũnh kêt rã'ã. Kumã dja me uma jarēnh rã'ã: rã'ã. Tãm dja me kàjmã kamēnh rã'ã rã'ã. Gêdja memã Bēnjadjwỳr ne meo ba rã'ã rã'ã. Mrãmri.

¹⁷ Ë, me pykakam ò nêkrêx kumexmã dja ga,

—Amijo arax kêt. Djãm nêkrêx kute me apytãrmã ne ga me nêkrêx kanàrrãm ar aba? Kati, kwãrĩk wãnh. Nêkrêx ne kajgo ne me abê biknor prãm. Kati, dja ga me Metĩndjwỳnh kanàrrãm ar aba. Metĩndjwỳnh ta ne kute òdjànhkôt me bamã mỳjja kunĩ nhõr, o kute me bakĩnh kadjy, ta kanàrrãm dja ga me ar aba, ane. ¹⁸ Gora me akabēn mexbit jarē ne mekam adjukaprĩn ar meo aba, ne memã anhõdjành ne memã anhõ mỳjja ngrà, ane.

¹⁹ Dja ga ã me ò nêkrêx krãptĩjamã arēnhõ ane gê me ã anen kam arỳm amityk nhijukri kadjy atemã kàjkwakam nêkrêxo aptã. Nêkrêx tãm ne mekbê biknor prãm kêt ne memã nõr rã'ã. Dja me kam arỳm 'ỳr bôx, mrãmri tu amitĩnkumrêx ja'ỳr bôx.

²⁰ Ë, Ximoxi, Metĩndjwỳnh kute amã kukràdjà

rerja gora prĩne omũ. Gora 'ãno djan omũnh tỳx. Me kabẽn kajgo, me kabẽn tũm dja wãnh nõ. Rũm kum akre rax. Nhym me 'êxri amijo kute mỳjja mar ne kam mỳr jabej abenkam kangati dja ad-jwỳnhdjwỳ wãnh nõ. ²¹ Mrãmri ne me kwỳ kupa'ã, —Ije mỳjja mar, anen kam ajbit mar ar o ba ne kam amibê arỳm Jeju mar kanga ne. Gê Metĩndjwỳnh ukaprĩkôt prĩne ajo djuw mex. Tãm ne ja.

Metĩndjwỳnh Kute Memã Kabẽn Ny Jarẽnh
New Testament in Kayapó (BR:txu:Kayapó)

copyright © 2012 Wycliffe Bible Translators, Inc.

Language: Kayapó

Translation by: Wycliffe Bible Translators, Inc.

Kayapó [txu], Brazil

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kayapó

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

PDF generated using Haiola and XeLaTeX on 22 Feb 2024 from source files
dated 29 Jan 2022

385317df-3c6a-53ac-81db-0815750ed560